

Flurin Jecker – la vusch e fatscha d'in protest

In giuven Rumantsch da Berna

DA CLAUDIA CADRUVI / ANR

■ **Dapi ch'el ha 13 onns va el en la Reithalle a Berna. Flurin Jecker studegia biologia, less forsa ina giada daventar schurnalist u scriptur e dapi la party gigantesca la sonda passada vulan tut las medias discurren cun el.** Èsi stà party, protest u politica – la demonstraziun da 10 000 persunas la sonda-dumengia notg passada? Questa dumonda occupa-scha anc adina la gliעד a Berna. Las medias tschertgan respostas. Ils organisaturs restan anonims. Uschia sa drizza l'interess sin *Flurin Jecker*. En ses blog s'exprima el gia dapi in temp davart la politica enturn la Reithalle ed era davart tematicas sco l'iniziativa da repatriament. Il student publitgescha columnas e videos. Ses messadi «Sorry, Herr Lerch – Wir machen da nicht mit» sin youtube han prest 12 000 persunas guardà. Il student plidenta en ses video il stalter da Berna che less rumir mintgamai suenter mesanotg il plaz avant la Reithalle e less scumandar la bar sin quest plazal.

«Jau sun mo 1 tranter 10 000»

El haja fatg part da la demonstraziun sco blers auters, raquinta Jecker. La sonda saira enturn las otg saja el i tar la Reithalle – il lieu da rimnada per la demonstraziun «Tanz dich frei!». La Schütz, il parcadi sper la Reithalle, saja gia stada plaina. I saja vegni anc dapli gliעד. In pievelun haja emplenì las vias fin a la staziun. L'emprim char da musica saja sa mess en moviment. I haja dà in til sco a la street-parade. Sulet che la demonstraziun eria illegala. La party è sa resada ora en las giassas da la citad.

Betg mo la giuventetgna haja fatg festa. Era blers sur 40 onns sajan vegnids, forsa persunas che hajan battì ils onns 80 per la Reitschule. La damaun enturn las 03.30 haja Patent Ochsner cumenzà a far concert. «Per la credibilitad èsi bun che la pli enconuschenta band da Berna ha sustegnì il protest», di Jecker.

Da mesanotg stuair ir a chasa?!

Entant che l'entira Svizra è stada surstada d'udir d'ina tala party gigantesca n'ha Jecker smirveglià gnanca zic. Gia trais emnas avant avevi dà in protest spontan sco reacziun sin il scumond da la citad da vender bavrondas avant la Reithalle. Ils plans dal stalter *Christoph Lerch* prevedevan da rumir a partir da las 00.30 il plaz avant il center da cultura.



Sto ina pierla discurre el sursilvan – Flurin Jecker ch'è creschi si a Berna.

FOTO C. CADRUVI

Quella notg che las novas disposiziuns fissan idas en vigur sajan var 3000 persunas – che sa chattavian avant la Reithalle – sa messas en moviment suenter mesanotg, raquinta Jecker. «Quai n'è betg stà organisà a lunga vista. Ins aveva mo dudi ch'i dettia forsa in til. Lezza giada sun jau stà surstà. Pertge igl era ina notg sin venderdi. Ils blers han stuì ir a scola u a lavurar l'autra damaun.»

Per Jecker èsi nunchapavel che la politica vul bandischar suenter mesanotg la giuventetgna dal plaz avant la Reithalle. Là na disturbian ins nagin. En la vischinanza sajan be il parcadi, il Bollwerk, l'universitad e la punt da Lorraine, pia naginas abitaziuns, nua che la gliעד veglia durmir. Il stalter Lerch argumenteschia ch'ins survegnia 80 reclamaziuns pervi da canera entaifer in onn. Quai na saja nagut en cumparegliaziun cun las reclamaziuns ed ils problems ch'i dess sche la giuventetgna sa trategness en l'avegnir en l'entira citad. Exact quai hajan ins vulì demonstrar cun la party gigantesca, di Jecker. «Quai è stà la raschun che 'Tanz dich frei' è daventà uschè in success.»

Dar temp a la politica

Dapi ch'el ha 13 onns va Flurin regularmain en la Reithalle. Là datti concerts, in'ustaria, in teater ed in kino. Ins n'è betg sfurzà da consumar. Sch'ins veglia baiver insatge survegnian ins ina bavronda per in pretsch favuraivel, raquinta il student. I na dettia a Berna strusch lieus nua che quai saja pussaivel. Ins possia bain ir a l'Aare, ma era là vegnia reclamà sch'i sa radunian gruppas pli grondas.

E co vai vinavant? Datti anc dapli demonstraziuns? «Ins sto uss dar la schanza a la politica da reagir», di Jecker. Suenter questa demonstraziun paschavla saja l'atmosfera buna. Da far immediat in'ulteriura demonstraziun gronda na fiss betg bun per la chaussa. Sch'ins vesia ch'i na capitia nagut possian ins anc adina cuntinuar cun partys da protest.

En sasez pretendia la giuventetgna gea betg uschè bler, mabain sulettamain da pudair mantegnair il status quo sin il plaz avant la Reithalle cun la bar da bavrondas favuraivlas. Ins veglia pudair star là nua ch'ins na disturbia en sasez nagin.

Londervi da scriver cudesch

Flurin Jecker ha 21 onns ed è creschi si a

Berna. La mamma che deriva da Mustér ha adina discurre rumantsch cun il figl che pleda perquai sco ina pierla sia lingua materna. Pliras giadas l'onn fa el vacanza a Mustér tar l'onda che abitescha a Buretsch.

Da preschent studegia Jecker biologia e quinta far l'atun il bachelor. Pli tard less el forsa daventar schurnalist. U forsa era scriptur? Pertge el è gist londervi da scriver in cudesch. Il titel è «Bloss tapfere Kinder».

Curt e bun

<i>Naschi ils</i>	20-10-1990
<i>Creschi si a</i>	Berna
<i>Abitescha a</i>	Münsingen
<i>Studegia</i>	biologia
<i>Musica preferida</i>	rap bernais
<i>Autur</i>	Thomas Bernhard
<i>Spaisa preferida</i>	salata
<i>Bavronda</i>	aua da spina

flurinjecker.wordpress.com